



« Fiadanana anie any an-danitra, ary voninahitra anie any amin'ny avo indrindra » (Lk. 19: 38)

Ry Kristianina havana, izao Alahadin'ny sampankazo izao no mampiditra antsika amin'ny herinandro masina izay ankalazantsika ny famonjena antsika dia Jesoa nanaiky ho fahotana, Izy izay tsy nanota mba hanafaka antsika amin'ny fahotana. Ny famonjena ankalazaintsika dia Andriamanitra nanaiky hanavotra antsika, nanaiky nanolotra ny ainy ho antsika, nanaiky ho faty hanafaka antsika amin'ny fahotana, amin'ny fahafatesana. Antsointsika herinandro Masina satria Masina izay miombona

amin'Andriamanitra. Masina izao herinandro izao satria mampiombona antsika amin'Andriamanitra. Masina isika rehefa miombona amin'Andriamanitra. Hararaoty àry izao herinandro masina izao hiombonantsika bebe kokoa amin'Andriamanitra.

Vakiteny I : Eks. Iz. 50, 4-7
Tononkira : Salamo 21
Vakiteny II : Fi1. 2, 6-11
Evanjely : Lk. 22, 14 - 23, 56

Maro ireo famantarana hibanjinantsika mandritra izao herinandro masina izao hanampy antsika hamelombelona ny finoantsika ary ny finoana no hahazantsika mandray izao herinandro izao ho masina ka mitondra antsika amin'ny Paka izay hahatonga antsika ho zava-boahary vaovao ao amin'Andriamanitra, anambarantsika fa olom-baovao tokoa isika. Izany no dikan'ny fanavaozantsika ny toky tamin'ny batemy sy andraisan' ireo olon-dehibe ny sakramenta maha-zanak'Andriamanitra azy amin'ny alin'ny Asabotsy masina. Izany ihany koa no antenaintsika amin'izao fiatrehantsika izao Sinaody izao hahatonga antsika ho OLON-DEHIBE AMIN'NY FINOANA.

Ny fankalazana ny Paka dia ankalazantsika koa ny fijalian'i Kristy izay atomboka amin'izao Alahady sampankazo izao. Miovaova arakaraky ny taona litorjika ny Evanjely vakiantsika fa ny Zoma masina dia ny evanjely nosoratan'I Md Joany hatrany no vakina fa tsy miova Ka amin'izao taona D izao dia I Md Lioka no vakintsika. Araka izany dia ny fijalian'I Jesoa arak'i Md Lioka no banjinintsika amin'izao Alahady ny sampankazo izao. Noho ny fitsilovan'ny Fanahy masina dia samy manana ny tsindrim-peo ireo mpanoratra ny evanjely, tsy mpanao reportage izy ireo fa manambara ny Vaovao Mahafaly nentin'i Jesoa. Ny tanjona dia ny hanampy antsika hivelona ny famonjena antsika araka ny averimberintsika matetika ny fankalazana ho antsika dia sady fahatsiarovana fa noho ny asan'ny Fanahy Masina dia afaka mivelona izay ankalazana. Eto dia mivelona ny Fijalian'ny Tompo isika mba hitondra antsika amin'ny Fitsanganany amin'ny Paka. Mifototra amin'ny zavatra telo ny tian'I Md Lioka ambara raha nanoratra ny Evanjely mitantara ny fijalian'I Jesoa Kristy izy.

Ny voalohany dia ny fivavahana, nivavaka tokoa I Jesoa ary ampianariny hanao an'izany isika satria io no làlam-pamonjena ho antsika "*Nahoana ianareo no matory, mifohaza mivavaha mba tsy ho azon'ny fakam-panahy*". Ny ady izay ataontsika amin'izao karemy izao dia miaraka amin'ny vavaka izay fiombonana amin'Andriamanitra, izay no manambara maha-zava-boahary antsika raha miombona amin'Andriamanitra isika, koa mivavaha, miambena mba tsy ho latsaka amin'ny fakam-panahy. Ny ady rehetra nataon'I Jesoa dia natrehiny tamin'ny alalan'ny vavaka, talohan'izay rehetra nataony dia nivavaka izy. Ny faran-tampon'ny vavaka dia ny fijaliana niainan'I Jesoa tamin'ny lakroa, io no vavaka faran-tampony. Izany no banjinintsika amin'izao Alahady ny sampankazo izao, io no foto-kevitra lehibe ary izany no ataontsika amin'izao Herinandro masina izao sy anasana antsika. Aoka hivavaka isika, tsy amin'izao hHerinandro masina izao ihany raha tiantsika ho zava-boahary vaovao isika, aoka hivavaka lalandava. Azontsika mazava tsara, azontsika onona tsara amin'izao ny mahatonga antsika amin'izao dingana voalohany amin'ny Sinaody izao nametraka hoe « Fianakaviana eglizy kely miara-mivavaka, miara-mandalina finoana ». Mila mivavaka ny fianakaviana mba hahafahantsika miady amin'izay korontana hitantsika eo anivon'ny fiainana efa tena sarotra amin'izao.

Izany no mbola ambaran'i Jesoa rehefa niady tamin'ny fakam-panahy izy ka nitodika tamin'i Piera "*Ry Simona, indro I satana mitady hikorokoroka anareo tahaka ny nataony tamiko, izaho mangataka ho anao, mivavaka ho anao mba tsy ho lavo ny finoanao ka raha mibebaka ianao dia hamafiso ny rahalahinao*". Mivavaka ho antsika I Jesoa tahaka ny nataony ho an'I Piera ka tsara raha miroso amin'izany làlam-piainana izany isika, aoka ho fiainam-bavaka ny fiainantsika mba ho Eglizy Olona Velona isika, ny maha-Eglizy ny Eglizy dia ny mivavaka. Mampirisika antsika àry hirotsaka bebe kokoa amin'ny Sinaody.

Ny faharoa tian'I Md Lioka ho tsapantsika dia i Jesoa tsy nanam-pahotana sy tsy manan-keloka, "*tsy hita izay mahameloka io lehilahy io*", teny matetika miverina amin'ny evanjely novakiantsika androany. Voaheloka tsy an-drariny I Jesoa ary nahatsapa an'izany ilay jiolahy teo akaikiny ka nanambara tamin'ilay jiolahy namany izay naneso an'i Jesoa nanao hoe "*ny antsika dia rariny izao satria nandray valin'ny ratsy nataontsika isika fa ny azy kosa tsy mba nanao ratsy na inona na inona izy*". Dia hoy I Jesoa namaly azy "*anio alina ihany dia hiaraka amiko any am-paradisa ianao*". I Jesoa voaheloka na dia olomarina aza ary ny kapiteny teo koa nilaza fa olomarina tokoa io lehilahy io. Tsy maintsy atrehintsika izany ny eso sy ny fanaratsiana, tsy ny zavatra ety ivelany mety mavesatra fa

aoka isika hijoro amin'ny finoana. Fampianarana ho antsika izany zavatra niseho tamin'I Jesoa izany. Maro ny zavatra miseho teo anivon'ny Eglizy, marina fa tsy isika no mitsara fa Andriamanitra, fa maro ny voaheloka tsy ara-drariny ka mampalahelo. Misy ny te hamono antsika, ny mamono vatana no azon'izao tontolo izao atao fa tsy afaka hamono ny fanahy kosa izy ireo. Hitantsika izany tamin'ny fiainan'ireo olomasina sy olontsambatra malagasy raha tsy hiresaka afa-tsy ireo ihany isika. Afaka maka ohatra an'i Victoire Rasoamanarivo olontsambatra, sy Lucien Botovasoa olontsambatra. Nijoro ho Olon-dehibe amin'ny finoana izy ireo ka nijoro amin'ny marina sy amin'ny fanehoam-pitiavana. Tsy kivy tamin'ny fanaovan-tsoa izy ireo araka ny hafatr'i Papa amin'izao karemy izao. Mangetaheta olona tahaka izany izao androntsika izao, enga anie ny fidirantsika amin'ny herinandro hanampy antsika handresy ny ratsy amin'ny alalan'ny tsara fijoroana ho vavolombelona.

Ny fahatelo dia ilay vavaka henontsika teo dia tsy an-kandrina na amin'ny molotra fa niantefa tamin'ny fiainan'I Jesoa ka nahatonga azy nanolotra ny ainy ary izany no vavaka faran-tampony ka raha niaraka tamin'ireo Apostoly izy dia nanolotra ny ainy ka tanteraka izany raha nilaza izy hoe "vatako atolotra ho anareo" "ny rako alatsako ho anareo", tanteraka ny fanoloran-tenany, ny fahafoizana izay nataony.

Azo asongadina amin'izao fidirantsika amin'ny Herinandro masina ka hibanjinantsika ny fijalian'I Jesoa araka nosoratan'I Md Lioka izao ny vavaka sy fahafoizana. Azontsika faranana amin'ny vavaka nataon'I Jesoa teo am-pototry ny hazofijaliana *"apetrako am-pelantananao ny fanahiko, Raiko avelao ny helony fa tsy fantany izay ataony*. Io koa no teny nataon'ny olontsambatra Lucien Botovasoa. Aoka hahay hifamela heloka isika, hifampizara ny famindram-po, araka ny tenin'I Papa Fransoa raha tiantsika hisy fandriam-pahalemana ny fiainantsika dia aoka isika hifamela heloka, aoka isika hifampizara famindram-po, raha tiantsika hanana fiadanam-po isika dia aoka hifamela heloka.

Raha mibanjina ny fijalian'I Jesoa isika, raha miditra amin'izao Herinandro masina izao, ADY sady DIA ny fiainantsika, ady amin'ny ratsy ka ny fototra hanoherantsika izany dia ny vavaka, fanoloran-tena ary fahafoizana amin'ny alalan'ny fifamelan-keloka sy fifamindram-po.

Ampio izahay ry Andriamanitra Rainay amin'izao fidiranay amin'ny Herinandro masina izao mba hiombona bebe kokoa amin'I Jesoa zanakao, amin'izay hahay hamola-tena izahay ka hahay hivavaka bebe kokoa handalina ny finoanay ka hahafoy amin'ireo manodidina anay indrindra ireo mahantra ka hivelona ireo asan'ny famindram-po hanehoanay fa Ray be fitiavana nahafoy an'I Jesoa ianao ka izahay koa irahinao hahafoy amin'ireo manodidina anay. Raha mahay mifamela heloka sy mifamindra fo izahay dia hiadana tokoa ka hampijoro tontolom-pinoana, tontolom-piainana sy tontolo iainana vaovao ka zary ho Eglizy Olona Velona mankalaza ny Paka ka hanorina Eglizy Tranon'Andriamanitra, ho taranaka mpanorina eo anivon'izao tontolo izao ka na dia misy ny mpanaratsy dia tsy ho menatra ny finoana izahay fa hijoro noho ny hasin'izao herinandro hiainanay izao ka hahatonga anay hivelona ny Paka amin'ny fiainanay andavanandro. Amen

Mompera Arsevka Benjamin Ramaroson